



**PRIMEIRO
MINISTRO**

**DISKURSU
SUA EXELÉNSIA PRIMEIRU-MINISTRU
KAY RALA XANANA GUSMÃO NIAN**

**IHA OKAZIAUN SESAUN ENSERRAMENTU SEMINÁRIU REJIONÁL
KONA-BA DESKOLONIZASAUN**

**“DALAN BA FUTURU SUSTENTÁVEL – PROMOVE
DEZENVOLVIMENTU SOSIO-EKONÓMIKU NO KULTURÁL
TERRITÓRIUS NAUN-AUTÓNOMUS”**

**Palm Springs Hotel, Díli, Timor-Leste
23 maiu 2025**



Palácio do Governo
Avenida Marginal
Dili, Timor-Leste

Exelénsias

Senhora Presidente, Menissa Rambally,
Karísimus Membrus no Delegadus Komité Espesiál
Senhoras no Senhores,

Ho laran haksolok boot tebes mak ha'u kumprimenta
distintus partisipantes Komité Espesiál Deskolonizasaun Nasoens
Unidas (C24), ne'ebé mai sorumutu iha Dili, iha loron tolu ne'e
laran.

Mai ami, governu ho povu Timor-Leste, ne'e hanesan
priviléjiu ida bele simu no realiza Semináriu rejionál Pasífiku nian
iha Díli, halo kolaborasaun ho Komité Espesiál Nasoens Unidas.

Ha'u felisita ema hotu-hotu ne'ebé envolve iha Semináriu
ne'e ba exelente organizasaun no ha'u hakarak hatu'o mós ha'u
nia apresiasaun ba Governu Indonézia, tanba fasilita pasajen ba
delegadus konferénsia iha trázitu iha Bali, hodi mai to'o Díli.

Exelénsias

Senhoras no Senhores,

Semana ida-ne'e espesiál tebes ba Timor-Leste!

Aleinde konferénsia ne'e, iha semana uluk, segunda-feira,
ami mós simu, iha Díli, primeira Konferénsia Solidariedade Ázia-
Pasífiku ba Saara Osidentál.

Lian ida-ne'e, lian povu saarauí, ne'ebé hanehan/taka kleur tebes ona, meu sékulu laran, iha senáriu internasionál, merese oita hotu nia atensaun ho ita nia asaun kolektiva no estratéjika.

Infelizmente, no hanesan bele observa durante loron hira ne'e, jornada deskolonizasaun ho autodeterminasaun territóriu naun autónomu sira seidak halo hotu, la'ós de'it ba Saara Osidental, maibé ba sira seluk tan.

No semana espesiál ida hotu tanba, iha dia 20 maiu, Timor-Leste celebra nia 23.º Aniversáriu Restaurasaun Independénsia.

Hanesan ita-boot sira hetan oportunidade atu entende di'ak liu iha-ne'e, experiénsia Timor-Leste nian mak istória ida nakonu ho susar no terus boot, maibé mós nakonu ho esperansa no rekonsiliaaun.

Liutiha tinan 24 rezisténsia ho diplomasia persistente (katak halo nafatin) iha Nasoens Unidas ba direitu ba autodeterminasaun, Timor-Leste ikusliu hetan nia objetivu hanesan **bele hili, hili moris iha paz no iha liberdade**.

No ami temi dehan "restaurasaun" tanba ami deklara tiha ona ami-nia independénsia iha 28 novembru 1975, maibé liutiha loron hitu ami hasoru okupasaun ilegál, husi ami-nia vizinhu, Indonésia.

No ha'u hakarak klarifika, tuir istória loloos, katak ami la'ós vítimas husi povu indonéziu. Aliás, grupu solidariedade barak ho

individualidades indonézius apoia no partilha ami-nia terus ho susar, no mezmua ami-nia luta.

Se ami hanesan vítimas, ne'e tanba rejime ida ho tan orden internasionál mai husi espektru Gerra Fria, ne'ebé ema hotu ta'uk expansaun husi rejimes ho natureza socialista, hahú husi vizinhu sira besik liu to'o país sira ne'ebé dook.

Timor-Leste hanesan liu vítima tanba ganánsia ho intereses komersiais husi poténsia sira seluk, ne'ebé ba sira rekursus materiais importante liu dignidade humana.

Loloos ami-nia rezisténsia armada la hasoru de'it tropas militares husi país okupante, maibé forsa armada boot ida husi países osidentais. Tanba ne'e, entre 1975 no 1979, ami lakon...no lakon tán funu ho ami-nia esperansa.

Foin iha tinan 1980 ba oin, ho estratéjia no envolvimentu husi populasau tomak, mak ami konsege reorganiza gerrilha rezisténsia nian. Ofertas ba rendisaun halo ba gerrilheiru balu, inklui ba ha'u, alisiantes (katak atrai maka'as).

Tanba ne'e, mak lisaun boot liu husi ami-nia experiénsia mak organizasaun, estratéjia no liuliu, envolvimentu husi populasau iha kauza nasional tau tan esforsus internasionais.

Ami-nia ambisaun la'ós buat seluk, mak hapara funu no hetan solusaun pasífika, atu nune'e bele promove kondisoens moris ne'ebé di'ak liu ba ami-nia povu, tanba kole no terus demais ona.

Inimigu la konsege hamohu ami, maibé ami husi rezisténsia mós nunka bele iha kbiit atu duni-sai forsa okupante. Tanba ne'e, resposta ba impase (ka, obstákulu) ne'e mak vontade povu tomak nian, hakarak foti desizaun atu kontinua terus ou simu rendisaun totál.

Defaktu, hateke ba kotuk, buat hotu la'o tuir vontade, forsa, aten-barani povu timor tomak nian!

Nune'e mak iha tinan 1980 ba oin,deside husu ba povu timor katak hakarak kontinua terus ou hakarak integrasaun. Karik opsaun vontade populár mak ida ikus liu ne'e, mak ami, rezisténsia timorensen, iha nia frente armada, klandestina no diplomátika, sei rende hotu.

Intensaun ne'e tranzmite ba Organizasaun Nasoens Unidas, ba Indonézia no ba Portugal. Ami hein tinan 16 atu ema bele haree no rona katak ami hakarak solusaun pasífika.No ida-ne'e,ha'u bele dehan, aumenta reziliénsia, korajen ho espíritu sakrifísiu husi povu timor.

Ha'u la haluha, bainhira Organizasaun Nasoens Unidas deside organiza referendu ida iha Saara Osidentál, ho kriaun MINURSO iha 1991, ami laran nakonu ho esperansa. Ami fiar katak depoizde povu saarauí sei to'o Palestina nia vez hafoin ami, Timor-Leste.

Maibé, iha 1992, referendu iha Saara Osidentál adia tiha, no adia to'o agora!

Timor-leste foti lisaun importante barak husi ezemplu ne'e no, bainhira iha 1999, ami simu proposta atu halo adiamentu ida hanesan ne'e hodi evita mosu violénsia, ami la simu atu dadanaruk ami-nia povu nia referendu iha Timor-Leste, tanba temi hanesan ezemplu desizaun kona-ba Saara Osidentál.

Maski hasoru ameasa hanesan intimidasaun ho violénsia, ami-nia povu firme no aten-barani nafatin.

Tanba ne'e, mak ha'u iha ligasaun partikulár ho Saara Osidentál. Sira-nia terus serve hanesan lisaun ba ami.

Exelénsias

Senhoras no Senhores,

Direitu internasionál mak solusaun, maibé tenke halo asaun liuhusi esforsu kolektivu, ho persisténsia, estratéjia ho diplomasia.

Tanba ne'e mak ami agora konklui katak timoroan sira-nia triunfu hanesan mós triunfu husi sistema internasionál.

Iha altura ne'ebá, hanesan agora, ha'u kontinua fiar katak só direitu internasionál mak sei bele hasa'e nasaun frájlil ho oprimidade sira-nia lian. Direitu internasionál hanesan instrumentu poderozu (katak forte liu) ba rezolusaun pasífika kona-ba disputas ho konflitus no mekanizmu promisór (katak fó esperansa boot) liu atu garante direitus ho dignidade ema nian, husi territóriu sira hotu, autónomus ou naun autónomus.

Ami, timoroan, hatene nanis ona sentimentu negasaun husi terseirus (ka parte sira seluk) ba direitos inalienáveis, tanba ne'e mak ami defende direito internacional hanesan kilat poderoza liu ba nasaun vulnerável sira.

Diálogu ho negosiasaun pasífika ba solusaun sira hanesan autodeterminasaun mak dalan ba futuro ho sustentabilidade.

Hanesan konklusaun, Timor-Leste fiar katak, hanesan ami mós iha possibilidade atu hetan ami-nia independência tanba uza direito internacional, mak território naun autónomu sira mós tuir loloos iha direito atu halo hanesan ami.

Ha'u hatene katak ita-boot sira rona, iha abertura Konferência ne'e, Presidente República, Dr. José Ramos-Horta, ne'ebé iha 1975, nia iha Frente Diplomática husi ami-nia luta ba libertasaun kontakta Komisaun Espesial Nasoens Unidas ba Deskolonizasaun.

Frente Armada ho Frente Klandestina, ne'ebé isoladas husi resistência guerrilha, nunca bele to'o atu projeta ami-nia kauza ho povu timor nia lian.

Presiza luta estrategicamente ba paz, satán iha mundu ida konturbadu (ka nakonu ho konfuzaun) hanesan ohin-loron, iha comunidade internacional ida ne'ebé iha meus pasífikus ho diplomátikus atu bele apoia rekonhesimentu kona-ba direitos lejítimus nasaun ho povu sira hotu.

Presiza defende multilateralizmu ho fórun sira hanesan C24, atu nune'e solidariedade ho kooperasaun internasionál bele manán.

Exelénsias

Senhoras no Senhores,

Eransa husi kolonializmu ho intereses ekonómikus ne'ebé impede povu sira-nia direitu lejítimu ba autodeterminasaun,tenke halakon tiha.

Ha'u fiar katak, iha semináriu iha Díli ne'e,ita bele hetan formas ho estratéjias foun atu defende dignidade, soberania ho potensíal povu sira hotu ne'ebé iha hela prosesu deskolonizasaun.

Hein katak territóriu naun autónomu sira-nia lian bele sai hanesan ita-nia lian rasik.

Hein katak forsa ho aten-barani iha ita-nia hanoin bele loke dalan ba asoens konkretas hanesan konxiansializasaun kona-ba direitus ne'ebé seidauk bele hetan ba kolónia sira dahikus liu iha ita-nia sékulu ne'e, iha ita ida-idak nia sosiedade.

Ha'u mós hein katak konkluzoens ho rekomendasoens husi Komité Espesiál Deskolonizasaun Nasoens Unidas, ne'ebé halo reuniaun iha Díli, bele hametin liután kultura ho identidade territóriu naun autónom sira, liuhusi asoens konkretas hodi garante sustentabilidade sosioekonómika ba sira-nia populasoens.

To'o soberania hotu-hotu nian sai hanesan direitu garantidu ida tuir lei internasionál, la iha povu ida mak bele nonook.

Muitu obrigadu.

Kay Rala Xanana Gusmão